



LIPOTI MO LE FONO AOAQ FAITULAFONO

Komiti o Galuega, Felauaiga & Siosiomaga

**Lipoti Faaletausaga a le Matagaluega o
Galuega, Felauaiga ma Atinae Eseeese mo
le Tausaga Faaletupe na faaiuina aso 30
Iuni 2014.**

(P.P. 2015/2016 Nu. 33)

E fautuaina e le Komiti o Galuega, Felauaiga ma Siosiomaga le Fono Aoao ina ia faautagia lana Lipoti.

1. IUGAFONO

E fautuaina e le Komiti ia le Fono Aoao ina ia faamaonia:

- P.P. 2015/2016 Nu. 33, Lipoti Faaletausaga a le Matagaluega o Galuega, Felauaiga & Atinae Eeseese mo le tausaga faaletupe na faaiuina aso 30 iuni 2014; ma
- Fautuaga a le Komiti ua tuuina atu i lalo.

2. FAUTUAGA:

E fautuaina e le Komiti le Malo ina ia:-

- la amana'ia e tauala atu i le Matagaluega o Tupe ma le Komisi o Tagata Faigaluega a le Malo, mo se vaegatupe e faatinoina ai le atinaeina o le itu tau tagata tomai faapitoa tau Vaalele Sivili, ina ia mafai ona faatinoina ni polokalame mo aoaoga mo le umiaina o ni faailoga aloaia.
- E tatau i le Matagaluega o Tupe i lalo o lana Tulafono o le Puleaina o Tupe a le Malo 2001, ona faama'oti mai se auivi mo Lipoti Faaletausaga a Matagaluega, ina ia mafai ona aofia mai ai ma Luitau, Faafitauli aemaise lava ia tatau lava ona tuuina faatasi mai ma le Lipoti a le Suetusi Sili i Tala Faatatau o Tupe ua maea ona sueina.
- E toe fautuaina e le Komiti le Malo, ina ia toe faamatuu mai le Vaega o Fuafuaga o Nofoga Tu-taulaga (PUMA), i lalo o le Matagaluega o Galuega, Felauaiga ma Atinae Eeseese ina ia faigofie mo le mamalu o le atunuu e fia faatinoina ni pemita o o latou Maota ma Laoa.

3. ILOILOGA:

3.1 Matafaioi Ausia:

Galuega Ausia mo le Vaitaimi 2013 - 2014:

O le Matagaluega o Galuega, Felauaiga & Atinae Eeseese, o se tasi lea o Matagaluega o lo o nafa ma tulaga i le Vaaiga Aoao Faatonutonu Faaletulafono (Regulatory Oversight), pe a fua i le tele o Tulafono o lo o faavaeina ai ana galuega faatino. I totonu o lenei Lipoti Faaletausaga, sa molimauina e le Komiti le

Ausia ai lea e le matagaluega o nisi o ana galuega sa faataatitia mai i tausaga faaletupe ua mavae, aemaise ai o se vaaiga taulai mo le lumanai. O galuega faatino na ausia e aofia ai:

- i. Faatinoina mo le uluai taimi o le *Tulafono Faalilolilo a Samoa i le tuuina mai o Lipoti tau faalavelave tutupu i vaalele sivili (SACAIR)*, mo le sini ina ia faalaua'iteleina le saogalemu e ala i le aoina mai lea o faamaumauga, e toe aoaoina mai ai ni malamalamaaga e mafai ai ona ta'imua i suiga o tulafono.
- ii. Faatautaia le Vaega 3 o Polokalame Faatonutonu i le Puipuiga o le Saogalemu o Vaalele Sivili, aemaise ai o Pepa malaga i femalagaiga i le 'Ea, mo le faamoemoe ina ia faatumauiina le puipuiga o le saogalemu o le siosiomaga o vaalele sivili.
- iii. O Oketopa 2013, na galulue vaavaalua ai le Vaega o Vaalele Sivili ma le Ofisa o le Saogalemu o Femalagaiga i le 'Ea o le Pasefika (PASO), ina ia faataatia galuega mo le tausaga 2014 aemaise ai o le faamautuina o le faamamaluina o le puipuiga o le saogalemu.

3.3 Tali atu i Manaoga:

1. Mulimulitaia o Tulafono:

O galuega tauave a le Matagaluega o Galuega, Felauaiga & Atinae Eseeese, o lo o limataitaia i lalo o Tulafono nei:

- I. Tulafono Autu Matagaluega o Galuega 2002.
- II. Tulafono Autu Matagaluega o Felauaiga 1978.
- III. Tulafono Autu o Vaalele Sivili 1998.
- IV. Tulafono Autu o Vaa 1998
- V. Tulafono o Puipuiga o le Gataifale ma Aafiaga Filogia 2008.

O lo o iai foi Tulafono Faatonutonu o lo o faapena ona limataitaia ai nisi o ana matafaioi, o nisi o Taiala, Faiga Faavae faapea Feagaiga ma Maliliega Faavā-o-Malo. O se tulaga sa matauina e le Komiti, o lo o faapena ona mulimulitaia pea e le Matagaluega ia tulaga uma faapea ai ma le tausisia ma le faatinoina o ana Tulafono i tulaga talafeagai.

2. Mulimulitaia o le Fuafuaga mo le Atinae o Samoa:

I totonu o le Taiala mo le Atinae o Samoa 2012 - 2016, o lo o taua ai, o le Matagaluega o Galuega, Felauaiga ma Atinae Eseeese, o lo o taulamua i le atinaeina o Itu Tau Atinae Tetele: e aofia ai le Vaaiga Aoao o le itu tau Femalagaiga ma Felauaiga, o Atinae tetele i luga o le Laualeele, Auaunaga Tau Vaalele, faapea ai ma le Atinae o le Vaega o le Gataifale ma Vaa.

I le maea ai o Iloiloga a le Komiti, na matauina ai o lo o faapena ona mulimulitaia pea e le Matagaluega o Galuega, Felauaiga ma Atinae Eseeese Taiala mo le Atinae o Samoa. ma o lo o taumafai pea ina ia faatinoina nei atinae tatau ma talafeagai mo le atunuu e pei o le Atinaeina o Auala, aemaise ai o le itu tau Vaalele Sivili e pei ona matauina ai e le Komiti i totonu o lana Lipoti sa iloiloina. O lo o taumafai foi le Matagaluega ina ia siitia le tulaga o Uafu aemaise o ni auala e faaleleia ma malupuipua ai mo se tulaga lelei e gafatia ai faamoemoega faava-o-malo.

3. Mulimulitaia o Vaegatupe Faamaonia mo le Vaitaimi 2013 - 2014:

O le aofaiga o le Tala Faatatau o Tupe mo le Matagaluega o Galuega, Felauaiga ma Atinae Eseeese mo le tausaga faaletupe na faaiuina i le aso 30 o Iuni 2014, e tusa lea ma le **\$3, 092, 475**.

TUPE MAUA:

O le aofaiga o Tupe Maua na mafai ona aoina i lea tausaga faaletupe e tusa lea ma le, **\$54, 476**. Matauina e le Komiti, e lei ausia le aofaiga o Tupe maua sa fuafuaina mai i Vaalele Sivili, e faapea foi i le Tulafono o le Gataifale. Na taua e le Matagaluega, o le faapogai o lea tulaga, ona sa tuai ona faamamaluina le siitaga fou o le tau o le auaunaga tuuina atu a le Matagaluega, sa faamoemoe ai le tele ai se tupe e aoina ae ua amata le tausaga faaletupe, ona faaoga lava lea o le tau sa iai muamua.

TUPE FAAALU:

O Tupe Faaalu a le Matagaluega e tusa lea ma le **\$3, 064, 321** mo le tausaga faaletupe lea o lo o iloiloina, ma e le o ausia foi le Aofai o Tupe na Fuafuaina e **\$3, 092, 475**.

Na matauina foi e le Komiti, o lo o iai se Tupe Totoe e tusa ma le **\$28, 154** ona e mafua mai i le tele o avanoa sa tuai ona faatumuina. I lalo o le Vaega o Galuega e avea ai ma sui o le Malo, e **\$10, 900, 626** se vaegatupe sa lē i mafai ona faaogaina, ma o lea vaegatupe na taua e le Matagaluega, e le oo iai lo latou malosiaga mo le faaogaina, ona o le Matagaluega o Tupe e nafa ma lea vaega.

3.4 Itu Mataituina:

1. Faafitauli/Luitau o lo o feagai ma le auaunaga a le Matagaluega:

E tolu ni vaega ua matauina e le Komiti, o lo o avea ma luitau i le faatinoina o matafaioi a le Matagaluega. O vaega nei e aofia ai:

- 1) E le o lava le agavaa ma le tomai faapitoa faapea le lē mafai ai lea ona umia ni faailoga faapitoa aemaise lava i le vaega tau Vaalele Sivili mo le mataituina o galuega faatino.
- 2) E leai ni aupega faa-tekonolosi (technological resources) e faatino ai le auaunaga i auala faaonaponei, aemaise o le aoina mai o faamaumauga.
- 3) O le lava o le itu tau seleni, o le faafitauli autu lea o lo o avea ma tulaga e le ausia ai le tele o ana galuega o le lē lava o le seleni, ma le 'uti'uti ai le faasoa.

2. Atugaluga o le Komiti:

Na taua e se tasi o Sui Usufono o le Komiti, le tatau ai lea ona faataatia se auivi mo le tusiaina o Lipoti Faaletausaga a Matagaluega uma a le Malo, ina ia laugatasia uma ai, ona e le o tutusa uma le faatinoina o lea tulaga. E le o ma'oti mai i lalo o le Tulafono o le Puleaina o Tupe a le Malo 2001, se auivi ina ia laugatasia uma ai Matagaluega uma a le Malo.

Matauina e le Komiti, o se tasi o tulaga faigata o lo o feagai ai ma le Matagaluega o le tau atinaeina o ana tagata faigaluega ina ia lava le tomai e faatinoina ai nisi o galuega e pei ona iai Vaalele Sivili ma isi, ona o le 'uti'uti o le seleni e faatautaia ai ni polokalame mo aoaoga, ina ia faaleleia ai lea itu o le auaunaga. Ole atugaluga o le Komiti, ona o se tasi lenei o Matagaluega o lo o taulamua i le faatinoina o galuega mo le atinaeina o le atunuu, ma e tatau lava ona matuai lelei lona atinaeina, aemaise lava o le itu tau tagata faigaluega.

Na taua foi e le Komiti le lē lelei o faatinoina o Fale e fua i luga o aiaiga a Konekarate mai fafo e iai Saina (building codes), ma e tatau lava ona iai se malosiaga o le Matagaluega i lalo o le Vaega o Aseta ma Fale, ina ia mataitu ai lea tulaga mo le saogalemu o galuega.

O lo o iai foi se vaegatupe na taua o lo o totoe mai i Galuega e Avea ai le Matagaluega ma Sui o le Malo, faapea ai ma galuega tuuina atu i isi vaega, lea e tusa lona aofai ma le \$10, 900, 626. E manatu le Komiti, pe le alagatau ona iai se fuafuaga a le Matagaluega o Tupe o lo o nafa ma lea tulaga, ina ia faamatuu atu mo le Matagaluega e faatinoina ai nisi o ana atinae tatau ma talafeagai.

4. FAAFETA:

E momoli le agaga faafetai ma le faamalo a le Komiti i le Ofisa Sili o Pulega ma le Pulega a le Matagaluega o Galuega Felauaiga ma Atinae Esee, ona o galuega lelei na faatinoina i totonuu o le tausaga faaletupe na iloiloina. O le tele o galuega ausia ua atagia ai le mataalia ma le mulimulitaia o tiute ma matafaioi na faavaeina ai le Matagaluega.

5. MOLIMAU:

A o faagasolo iloiloga a le Komiti na mafai ona fofogaina faamatalaga molimau na tuuina mai e:-

Matagaluega o Galuega, Felauaiga ma Atinae Eseese:

Vaaelua Malu Nofo Vaaelua	-	Ofisa Sili o Pulega
Faamaini Vaa	-	Ofisa Sili Lagolago o Pulega <i>(Vaega o Auaunaga Lautele).</i>
Nanai Junior Saaga	-	Ofisa Sili Lagolago o Pulega <i>(Vaega o Vaalele Sivili)</i>
Fepuleai Faleniu Alesana	-	Ofisa Sili Lagolago o Pulega <i>(Vaega o Vaa ma le Gataifale).</i>
Muliagatele Paulino Pania	-	Ofisa Sili Lagolago o Pulega <i>(Vaega o Fuafuaga ma Faiga Faavae).</i>

6. PEPA NA ILOILOINA:-

P.P.2014/2015, Nu. 17, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe na faaiuina i le aso 30 Iuni 2013.

Saini a le Komiti:

TUSA Misi Tupuola
TAITAFONO

AFOAFOUVALE John Moors
SUI TAITAFONO

LEVAOPOLO Talatonu
SUI USUFONO

LEALAILEPULE Rimoni Aiafi
SUI USUFONO

TOEOLESULUSULU Cedric P.P.S.
SUI USUFONO

PESETA Vaifou Tevaga
SUI USUFONO

FAGAAIVALU Kenrick Samu
SUI USUFONO